

**Zairil alu-alukan pemilihan semula CEC DAP, akan bertanding  
Malaysian Insider  
Aug 17 , 2013  
OLEH DIYANA IBRAHIM**

Zairil Khir Johari (gambar) yang merupakan satu-satunya anggota kaum Melayu yang menang pemilihan Jawatankuasa Tertinggi Pusat (CEC) DAP lalu mengalu-alukan pertandingan semula dan berikrar akan bertanding dalam pemilihan tersebut.

Menurut ahli Parlimen Bukit Bendera itu, keputusan DAP untuk mengadakan pemilihan semula CEC merupakan langkah wajar bagi mengelakkan pembatalan parti itu.

"Pada detik yang amat genting ini, di mana kewujudan parti diancam oleh sebuah rejim yang lantang menyalahgunakan kuasa, pucuk pimpinan parti tidak mempunyai pilihan lain," kata Zairil dalam satu kenyataan hari ini.

"Harapan saya cumalah satu, agar para perwakilan memilih calon-calon yang terbaik berdasarkan kebolehan, keupayaan dan rekod prestasi mereka. Sesiapa pun yang berjaya, biar prinsip ini dikekalkan," tambah beliau lagi.

Zairil melahirkan rasa kesalnya dan mendakwa DAP menjadi mangsa dan dihukum dengan sewenang-wenangnya walaupun tidak bersalah.

Menurut anak kepada bekas pemimpin Umno Tan Sri Khir Johari itu, DAP tidak mempunyai masalah sekiranya apa yang dituduh Jabatan Pendaftaran Pertubuhan (RoS) terhadap parti itu dapat dibuktikan.

Akan tetapi menurutnya, RoS masih gagal memberi sebarang sebab atau penjelasan mewajarkan tindakan yang diambil.

"Segala tuduhan liar termasuk dakwaan 753 orang perwakilan yang kononnya dinafikan hak untuk mengundi, 547 orang 'perwakilan hantu' , serta kewujudan 'Father Augustus Chen' tidak pernah dibuktikan dan merupakan rekaan jahat musuh politik DAP semata-mata.

"Malah, Pendaftar Pertubuhan Datuk Abdul Rahman Othman juga enggan bertemu dengan Setiausaha Agung DAP Lim Guan Eng yang telah berkali-kali menuntut penjelasan daripada pihak ROS," katanya.

Tegas beliau hakikatnya DAP tidak melanggar Akta Pertubuhan 1966 dan segala kesilapan teknikal yang berlaku semasa pengumuman keputusan pemilihan pada bulan Disember 2012 telah pun diperbetulkan.

"Selain daripada kesilapan yang tidak sengaja itu, seluruh proses pemilihan telah dijalankan secara teratur dan bersih.

"Malah, keputusan yang sebenar sudah pun diperakui oleh sebuah firma akauntan yang telah diminta untuk menyemak semula undian yang dibuat," tambahnya. – 17 Ogos, 2013

Hakcipta © 2013 The Malaysian Insider

Source:

<http://www.themalaysianinsider.com/bahasa/article/zairil-alu-alukan-pemilihan-semula-cec-dap-akan-bertanding>

